

Banjir kilat: Dua bayi antara lapan mangsa diselamatkan

oleh ROSILAWATI ROSEDI 10 Ogos 2023 08:54am **Masa membaca: 1 minit**



Keadaan kawasan yang terjejas akibat banjir kilat dekat Klinik Desa Sri Jaya, Maran. Foto Ihsan JBPM

MARAN - Dua bayi lelaki antara lapan mangsa yang diselamatkan akibat banjir kilat berhampiran Klinik Desa Sri Jaya dekat Jalan Gambang-Marang di sini awal pagi Khamis.

Pegawai Perhubungan Awam Jabatan Bomba dan Penyelamat Malaysia (JBPM) Pahang, Zulfadli Zakaria memberitahu, pihak bomba menerima panggilan kecemasan mengenai kejadian tersebut pada jam 4.58 pagi.

Menurutnya, seramai tujuh anggota dan dua pegawai bersama empat jentera termasuk sebuah bot aluminium dari Balai Bomba dan Penyelamat (BBP) Maran dikejarkan ke tempat kejadian.

"Komander operasi melaporkan benar berlaku banjir kilat di kawasan kediaman yang dilaporkan.



Pihak bomba dari BBP Maran menjalankan operasi menyelamatkan mangsa di kawasan terbabit yang dilanda banjir kilat awal pagi Khamis. Foto Ihsan JBPM

"Mangsa terdiri tiga lelaki dewasa, seorang warga emas lelaki, seorang kanak-kanak lelaki dan perempuan serta dua bayi lelaki," kata beliau dalam kenyataan pada Khamis.

Ujar beliau, kesemua mangsa diselamatkan di dalam satu rumah dengan kedalaman air 0.5 meter.

Tambah Zulfadli, pasukan terlibat membuat penyelamatan mangsa dengan menggunakan bot dan dihantar ke tempat selamat.